

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN KESAVAN A/L SUBRAMANIAM
[SUNGAI SIPUT]**

SOALAN

TUAN KESAVAN A/L SUBRAMANIAM [SUNGAI SIPUT] minta **MENTERI KESIHATAN** menyatakan langkah-langkah yang telah diambil oleh Kementerian membendung gelombang ketiga penularan wabak COVID-19 meningkat secara mendadak.

JAWAPAN

Tuan Yang di-Pertua,

1. Sebagaimana semua sedia maklum, gelombang ketiga COVID-19 di Malaysia bermula pada 20 September 2020 memandangkan terdapat peningkatan pelaporan kes COVID-19 di beberapa negeri. Negeri-negeri yang melaporkan kes COVID-19 yang tertinggi adalah negeri Sabah. Lonjakkan kes COVID-19 semasa fasa Perintah Kawalan Pergerakan Pemulihan (PKPP) ini mendorong Kerajaan untuk mengambil langkah-langkah proaktif dan berkesan untuk membendung penularan jangkitan COVID-19 di Malaysia.
2. Justeru, bagi memastikan koordinasi bagi aktiviti pengesanan kes dan kawalan pencegahan COVID-19 dapat dijalankan secara sistematik dan berkesan di setiap negeri, Kerajaan telah melaksanakan Perintah Kawalan Pergerakan Bersyarat (PKPB) dan Perintah Kawalan Pergerakan Diperketatkan Bersasar (PKPDB) beberapa negeri. Bagi kawasan di mana PKPB dilaksanakan, pendekatan saringan secara bersasar akan digunakan – khususnya melibatkan kontak rapat kes COVID-19 yang dikesan di lapangan dan dalam kalangan individu yang didapati memenuhi kriteria sebagai golongan berisiko tinggi. Pendekatan ini mengambilkira kapasiti makmal sediaada dan seterusnya keupayaannya untuk memaksimakan keberhasilan daripada aktiviti saringan yang dijalankan.
3. Kementerian Kesihatan Malaysia telah mengambil pelbagai langkah-langkah untuk membendung penularan jangkitan COVID-19 semasa gelombang ketiga ini. Langkah-langkah tersebut adalah seperti berikut:
 - i. Mempertingkatkan aktiviti pengesanan kes dan kontak secara aktif di lapangan bagi memastikan kesemua yang terlibat disaring dan diasingkan daripada komuniti;
 - ii. Menjalankan aktiviti nyah kuman dan nyah cemar;
 - iii. Mempertingkatkan penguatkuasaan pematuhan Prosedur Operasi Standard (SOP);

SOALAN NO : 200

- iv. Menekan pentingnya pematuhan Prosedur Amalan Standard (SOP) yang ditetapkan oleh Kerajaan;
 - v. Memberi pendidikan kesihatan kepada masyarakat termasuklah nasihat-nasihat KKM;
 - vi. Mempertingkatkan komunikasi risiko, termasuk memaklumkan situasi terkini COVID-19;
 - vii. Meningkatkan kapasiti ujian makmal RT-PCR dan RTK Antigen;
 - viii. Meningkatkan kapasiti katil di hospital COVID-19 serta Pusat Kuarantin dan Rawatan Berisiko Rendah (PKRC) termasuklah penyediaan hospital medan dengan kerjasama Angkatan Tentera Malaysia (ATM) di Tawau;
 - ix. Meningkatkan kapasiti katil Unit Rawatan Rapi (ICU) dan alat mesin bantuan pernafasan (*ventilator*);
 - x. Meningkatkan kapasiti dan mobilisasi tenaga sumber manusia Perubatan dan Kesihatan Awam; dan
 - xi. Penyumberluaran (*outsourcing*) perkhidmatan Perubatan bagi kes-kes bukan COVID-19.
4. KKM telah melaksanakan langkah bersifat tuntas dalam mengekang penularan jangkitan COVID-19 di kalangan masyarakat setempat. KKM memperkenalkan Agenda Nasional Malaysia Sihat (ANMS) bagi menjadikan rakyat Malaysia daripada semua peringkat agar sihat dari segi fizikal, mental dan sosial serta mengamalkan norma baharu kesihatan. ANMS ini menjadikan *health in all policies* sebagai keutamaan dengan menggunakan pendekatan *whole of government* dan *whole of society* melalui penglibatan semua kementerian, agensi kerajaan, swasta, Pertubuhan Bukan Kerajaan (NGO) dan komuniti bagi memastikan pelaksanaan yang menyeluruh. Selain itu, Kerajaan juga sedang melaksanakan Kempen Pembudayaan Norma Baharu menggunakan pendekatan “Cegah dan Didik, Amal, Patuh dan Pantau.” Bagi memastikan pelaksanaannya, pelbagai pihak dilibatkan iaitu Klinik Kesihatan, Pejabat Kesihatan Daerah, Majlis Tindakan Daerah, NGO dan pemimpin-pemimpin komuniti.
5. Kerajaan akan terus menjalankan langkah-langkah pencegahan dan kawalan COVID-19 di Malaysia. Mengambil kira sehingga kini

SOALAN NO : 200

masih tiada vaksin untuk mencegah dan tiada ubat untuk merawat COVID-19. Justeru, saranan dan nasihat yang sering ditekankan oleh KKM haruslah terus dipatuhi kerana ini merupakan tanggungjawab sosial yang patut diamalkan sebagai usaha bersama mengekang jangkitan COVID-19. Jadikanlah nasihat-nasihat ini satu kebiasaan baharu dalam kehidupan harian:

- Elakkan 3S / 3C; iaitu elakkan kawasan yang sesak (*Crowded place*), elakkan kawasan yang sempit (*Confined space*) dan elak sembang atau bertutur dengan jarak yang dekat (*Close conversation*).
- Elakkan bersalaman / bersentuhan termasuk melagakan mana-mana bahagian tubuh badan sebagai mengantikan cara kebiasaan bersalam dan:
 - Amalkan etika batuk dan bersin;
 - Dapatkan rawatan segera jika bergejala;
 - Duduk di rumah dan elakkan kunjung-mengunjung;
 - Lakukan aktiviti disinfeksi dan pembersihan di kawasan yang kerap disentuh.
- Patuhlah kepada S.O.P sebagai normal baharu iaitu:
 - **S:** Syarat-syarat seperti yang ditetapkan di bawah Perintah Kawalan Pergerakan Pemulihan (PKPP);
 - **O:** Orang yang berisiko tinggi seperti kanak-kanak, bayi, warga emas dan orang kurang upaya (OKU) perlu dilindungi, individu tidak sihat dan bergejala dikehendaki segera menjalani pemeriksaan kesihatan;
 - **P:** Penjarakan fizikal (*physical distancing*) sekurang-kurangnya 1 meter diamalkan pada setiap masa.

Sekian, terima kasih.